

Нақд пулдан олинадиган закот | Фикҳ дарслари (300-дарс)



19:00 / 26.09.2024 2087

Пуллардан закот чиқариш фарз экани Қуръон, суннат ва ижмоъ ила собит бўлган:

1. Қуръони Каримнинг Тавба сурасида:

﴿الَّذِينَ يَكْتُمُونَ مَا آتَاهُمُ اللَّهُ مِنْ فَضْلِهِ أُولَٰئِكَ سَيُعَذِّبُ اللَّهُ عَذَابًا عَظِيمًا ۝﴾

«Олтин ва кумушни жамғариб, Аллоҳнинг йўлида сарфламайдиганларга аламли азобнинг «хушхабар»ини беравер...» (34-оят) деб марҳамат қилинган.

Ушбу оят тилла ва кумуш пулларнинг закотини бериш фарз эканига ёрқин далилдир.

2. Тилла ва кумуш пуллардан закот бериш фарзлиги, нисоби ва закот миқдорига тегишли ҳадисларни юқорида яхшилаб ўргандик.

3. Тилла ва кумуш пуллардан закот бериш фарз эканлигига ҳамма асрларда ҳам барча мусулмонлар бир овоздан иттифоқ қилиб келганлар.

Ўша вақтдаги бир динар бир мисқолга тенг бўлган, демак, йигирма динар йигирма мисқолга тенг. Йигирма мисқол эса 85 грамм бўлади. Икки юз дирҳам эса 595 грамм кумушга тенг бўлар экан.

Демак, 85 грамм тилла ёки 595 грамм кумушга эга бўлган одам нисобга етган молга эга ҳисобланади ва закот бериши фарз бўлади.

Ҳозирги пайтда тилла ҳам, кумуш ҳам пул бирлиги сифатида ишлатилмай қўйди. Ҳамма жойда қоғоз пул ишлатилмоқда. Қоғоз пуллар янги чиққан пайтда «Бу пуллардан закот чиқариладими, йўқми?» деган савол пайдо бўлди.

Ҳанафийлар дарҳол: «Закот чиқариш керак», дейишди.

Вақт ўтиши билан ҳамма ҳанафий мазҳабига юришга мажбур бўлди, чунки дунё бўйича фақат қоғоз пул билан муомала қилинадиган бўлди. Бунинг устига, ҳар бир давлат ўзи чиқарган пулни тилла билан қоплайдиган бўлиши халқаро таомилга киритилди.

«Кифоя» китобининг иккинчи жузи асосида тайёрланди

Ушбу китоб Ўзбекистон Республикаси Дин ишлари бўйича қўмитанинг 2022 йил 5 октябрдаги 03-07/7013-рақамли хулосаси асосида чоп этилган.